

四庫全書

集部

欽定四庫全書

集部

呂衡州集卷一至四

詳校官監察御史^臣邱文恒

檢討^臣何思鈞覆勘

總校官編修^臣王燕緒

校對官主事^臣陸湘

謄錄監生^臣印鴻翥

欽定四庫全書

集部二

呂衡州集

別集類一 唐

提要

臣等謹案呂衡州集十卷唐呂溫撰溫字和叔一字化光河中人貞元十四年進士官至刑部郎中兼侍御史後謫道州刺史徙衡州卒事迹具唐書本傳劉禹錫編次其文稱斷自人文化成論至諸葛武侯廟記為上篇此

本先詩賦後雜文已非禹錫編次之舊又第六卷七卷誌銘已缺數篇蓋後人所掇拾重編也溫亦八司馬之黨當王叔文敗時以使吐蕃倖免其人品本不純粹而學春秋于陸渾學文章于梁肅則授受頗有淵源集中如與族兄舉書深有得于六經之旨送薛天信歸臨晉序洞見文字之原裴氏海昏集序論詩亦殊精邃古東周城銘能明君臣之義以

糾左氏之失其思子臺銘序謂遇一物可以
正訓于世者秉筆之士未嘗闕焉其文章之
本可見矣惟代尹僕射度女為尼表可以不
存而諸葛武侯廟記以為有才而無識尤好
為高論失之謬妄分別觀之可矣乾隆四十
六年十一月恭校上

總纂官臣紀昀陸錫熊臣孫士毅

總校官臣陸費墀

呂衡州集原序

五行秀氣得之居多者為雋人其色瀲灩於顏間其聲
發而為文章天之所與有物來相彼由學而致者如工
人染夏以視羽畎有生死之殊矣初貞元中天子之文
章煥乎垂光慶霄在上萬物五色天下文人為氣所召
其生乃蕃靈芝萐脯與百果齊拆然煌煌翹翹出乎其
類終為偉人者幾希矣東平呂和叔實生是時而絕人
遠甚始以文學震三川三川守以為貢士之冠名聲四

馳速如羽檄長安中諸生咸避其鋒兩科連中芒刃愈
出德宗聞其名自集賢殿校書郎擢為左拾遺明年回
紇請和上問能使絕域者君以奇表有專對才膺選轉
殿內史錫之銀章還拜尚書戶部員外郎轉司封遷刑
部郎中兼侍御史副治書之職會中執法左遷緣坐謫
道州刺史以善政聞改衡州年四十而歿後十年其子
安衡泣奉遺草來謁咨予紬之成一家言凡二百篇和
叔名溫別字化光祖考皆以文學至大官早聞詩禮於

先侍郎又師吳郡陸質通春秋從安定梁肅學文章勇
於藝能咸有所祖年益壯志益大遂撥去文字與雋賢
交重氣槩覈名實欣然以致君及物為大欲每與其徒
講疑考要皇王富强之際臣子忠孝之道出入上下百千年
間詆訶角逐疊發連中得一善輒盱衡擊節揚袂頌足信容
得色舞於眉端以為按是言循是理合乎心而氣將之昭
昭然若揭日月而行孰能關其勢而爭天光者嗚呼言
可信而時異道甚長而命窄精氣為物其有所歸乎古

之為書者先立言而後體物賈生之書首過秦而荀卿亦後其賦和叔年少遇君而卒以謫似賈生能明王道似荀卿故余所先後視二書斷自人文化成論至諸葛武侯廟記為上篇佗咸有為為之始學左氏書故其文微為富艷夫羿之闢弓惟已蛇九日乃能盡其殼而回注鶚爵亦要中於尋常之間非羿之於弓有能有不能所遇使然也後之達解者推而廣之知予之素交不相索於文字之內而已

欽定四庫全書

呂衡州集卷一

唐 呂溫 撰

詩賦

由鹿賦

并序

貞元丁卯歲予南出襄樊之間遇野人繫鹿而至者問
之答曰此為由鹿由此鹿以誘致羣鹿也備言其狀且
白此鹿每有所致輒鳴嗥不飲食者累日余喟然曰虞

之即鹿必以其類致之人之即人也亦必以其友致之
實繁有徒古之然矣嗟夫鹿無情而猶知痛傷人與謀
而宴安殘酷彼何人斯彼何人斯物微感深遂作賦曰
鹿之生兮亦稟亭毒備齒角而無競循性情而自牧姑
有味於行止尚焉知乎倚伏捨爾崇林輕遊近麓偶巧
網之生致蒙主人之全育飲以渌井飼於芳庭寢訖荃
柔騰倚蘭馨露往霜來日安月寧雖矯性而非樂終感
恩而不驚曾不知養非玩物用有深意命之曰由俾陷

其類涼秋八月爽景清氣羈致山阿縻於蹊隧設伏以
待賢叢而伺同氣相求誘之孔易將必慕侶豈云貪餌
呦呦去聲和鳴麋麋狎至彼泯慮於猜信此無情於誠偽

孰是倉猝禍生所忽毒鎬歛以星貫潛機劃其電發或
洞胷而達腋或折足而碎骨望林巒兮非遠顧町疇兮
未滅風嗥澤而北至今日掩山而西沒走駭侶於巖烟
叫饑靡於澗月苟行路之聞者孰不心摧而思絕相爾
由矣野心而仁望純束而驚顧隨獲車而逡巡視鼎中

之消爛觀机上之剖分忽哀鳴以感類若沉痛之在身
雖復處之密邇享以豐珍比檻猿之駭躍同海鳥之愁
辛敢擇蔭而後死思走險其何因痛無知以相陷含惋
毒而莫申客有感而言曰物誠有諸人亦宜乎撫事或
比原心即殊借如淮陰構禍寃在神理通說且拒弑謀
寧起堂堂蕭公實曰知己紹致鍾室胡寧忍此呂祿之
難誰非漢臣交則不義賣亦不仁彼美酈生既為交親
誘襲軍印豈無他人於戲微獸傷類如不自容伊人賣

友以享其功滅交道兮墜義風曾麋鹿之不若何仁信之可宗已焉哉諒此世之茫茫吾未見其始終

黃龍負舟賦

克巳勤物大
川効靈為韻

夏后氏奠山疏川極溺開泰玄珪錫命既成天下之功
黃龍發祥始耀域中之大當其駐軫江甸艤舟洪川天
行健而時有未濟地設險而瞻之在前思利涉以撫俗
遂精誠而告虔於是雲氣鬱起神光爛然奮髯於勿用
之窟驤首於或躍之泉安波澄澗奉天意以顯若拖尾

垂鬣夾王舟而負鳥合靈符於百代表聖運於千年徒
偉夫出無情馳不測如驅風雷若有羽翼觀竭誠以効
用似就列而陳力電目流光金鱗耀色天吳奔走陽侯
屏息巨險迄濟孰假剡木之能潛怪莫逢寧資畫鷁之
飾應變化以昭感出沉潛而剛克其慶惟大賴祉福者
兆人其觀惟榮執玉帛者萬國若非平水堙土泣辜罪
已菲飲食以昭儉卑宮室而思理德掩乎生成之初功
齊乎開闢之始則安有非常之神物不召而萃止濟其

不通而彰其具美者也至於漢橫汾水秦抵滄溟實逞
心欲匪崇德馨生人之盡瘁靡念方士之空言是聽姑
幸免於覆溺夫何望乎炳靈於戲動罔軌道言非善教
則人雖愚弱或使之而不効其志惟純其德孔殷則龍
雖神化將不役而自勤信矣哉國家俾人其蘇在理無
鬱超乎大禹不務舟車之勞宛彼黃龍但為宮沼之物
而已

白雲起封中詩

題中用韻
六十字成

封間白雲起漢帝坐齋宮望在泥金上疑生祕玉中攢
柯初繚繞布葉漸蒙籠日觀祥光合天門瑞氣通無心
已出岫有勢欲凌風儻遣成膏澤從茲遍大空

吏部試樂理心賦

易直子諒油
然而生為韻

道無象天無聲聖不有作曷觀化成於是鼓吹大塊鏗
鏘元精因乎心而式是理本形乎器而強為樂名以齊
五方之俗以厚萬物之生始積中而發外卒克性而約
情樂與心冥則所曰固天之縱心由樂理亦得夫自明

而誠至若樂在朝廷君臣叶義一發而陽唱陰和九變而雲行雨施上以見為君之難下以知為臣之不易有國者理心以此必獲儀鳳之嘉瑞若乃樂在閨闥父子靜專蓋取諸無荒而樂有節而宣和以嚴濟愛由敬全有家者理心以此必反天性於自然且夫樂之作也一動一息樂之理也惟清惟直然後能在聽而必聰無入而不得節有序覩貫珠而匪珠聲成文見五色於無色其或惟邪是念惟慝是度則雖琴瑟在御管磬聿修立

樂之方既失理心之術何求亦焉望變澆風之浩浩致和氣之油油徒觀其心尚玄通樂資交暢明贊天地之化育幽索鬼神之情狀會節有極象之則動而時中應變無方擬之則貞而不諒至矣哉至樂希夷侯其禕而聽之以心固不資於子野作不在德亦無俟於后夔方今敦和統同反本復始辨六律以分職齊八風而同軌洪鐘虛受我則聞其直言朱絃遺音我則戒夫專美此吾君之以樂理心也宜乎貴為天子

終南精舍月中聞磬聲詩

題中用韻
六十字成

月峯禪室掩幽磬靜昏氛思入空門妙聲從覺路聞泠
泠滿虛壑杳杳出寒雲天籟疑難辨霜鐘詎可分偶來
遊法界便欲謝人羣竟夕聽真響塵心自解紛

禮部試鑒止水賦

澄虛納照遇物分形為韻任
不依次用限三百五十字以

上

水止矣靜之其徐物鑒矣久而益虛且無情於美惡又
奚議夫親疎委質爰來所期乎上善同利忘筌已悟寧

患乎至清無魚若乃迴塘月抱高岸環合泥滓湛而自
沉金砂炯其不雜同道德之以虛而受異川澤之唯污
是納有斐君子此焉明徵氣隨波息心與源澄端形赴
影如木從繩其表微也挂金鏡而當畫其索隱也隔玉
壺而見冰爾其色必洞澈光無滉漾不蒸鬱鬱之氣不
激潺湲之響百丈在目千仞指掌惡每自乎中見美實
非乎外獎鑒形之始方似以身觀身得意之間乃同求
象忘象徒觀其下倒星漢上披烟雲守其常而性將道

合居其所而物以羣分君鑒之以平心臨下必簡臣鑒
之而厲節在邦必聞妍媸無形兮唯人所召物我兼遺
兮水無私照廉士以之立誠至人以之觀妙豈比夫流
若激矢波如建瓴不捨晝夜爭輸滄溟徒乖躁靜之理
莫辨真偽之形者哉國固以賢為止水鑒有餘裕羣形
鱗集衆象景附濫巾竊吹者十手所指研精撫實者千
載一遇夫如是姑自攝其威儀亦何憂而何懼

青出藍詩

題中用韻限
四十字成

物有無窮好藍青又出青朱研方比德白受始成形袍
襲宜從政衿垂可問經當時不採擷佳色幾飄零

奉和李相公早朝于中書候傳點偶書所懷奉

呈門下武相公中書鄭相公

禁門留騎吹內省正衣冠稍辨旂裳色尚聞鐘漏殘九
天爐氣暖六月玉聲寒宿霧開霞觀晨光泛露盤致君
期返朴求友得如蘭政出同歸理言成共不刊準繩臨
百度領袖映千官卧鼓流沙靜飛航漲海安盡規酬主

意偕賦代交歡雅韻人間滿多慙竊和難

奉和武中丞秋日臺中寄懷簡諸僚友時西蕃
使迴奉命追和

聖朝思紀律憲府得忠賢指顧風行地儀刑月麗天不
仁恒自遠為政復何先虛室唯生白閒情却草玄迎霜
紅葉早過雨碧苔鮮魚樂翻秋水烏聲隔暮烟舊遊多
絕席感物遂成篇更許窮荒谷追歌白雪前

吐蕃別館和周十一郎中楊七錄事望白山作

純精結奇狀皎皎天一涯
玉嶂擁清氣蓮峯開白花
半巖晦雲雪高頂澄烟霞
朝昏對賓館隱映如仙家
風聞蘊孤尚終欲窮幽遐
暫因行役暇偶得志所嘉
明時無外戶勝境即中華
況今舅甥國誰道隔流沙

奉和張舍人閣中直夜思聞雅琴因書事通簡僚友交朋

迢遞天上直寂寞丘中琴
憶爾山水韻起予仁智心
凝情在正始起想疎煩襟
涼生子夜後月照禁垣深
遠風

藹蘭氣微露清桐陰方襲緇衣慶永奉南薰吟

和舍弟恭惜花絕句

時蕃中
使回

去年無花看今年未看花更聞飄落盡走馬向誰家

和恭曉聽籠中山鵲

掩抑沖天意悽愴觸籠音驚曉一聞處傷春千里心

和舍弟讓詠籠中鷹

未用且求安無猜也不殘九天飛勢在六月目睛寒動
觸樊籠倦閒銷肉食難主人憎惡鳥試待一呼看

同恭夏日題尋真觀李寬中秀才書院

閒院開軒笑語闌江山併入一壺寬微風但覺杉香滿
烈日方知竹氣寒披卷最宜生白室吟詩好就步虛壇
願君此地攻文字如鍊仙家九轉丹

同舍弟恭歲暮寄晉州李六協律三十韻

古人猶悲秋況復歲暮時急景迫流念窮陰結長悲陽
鳥下西嶺月鵲驚南枝攬衣步霜砌倚杖臨冰池怳怳
若有失悄悄如不怡忽聞晨起吟宛是同所思有美壯

感激無何遠棲遲推藏變化用掩抑扶搖姿時傑豈虛
出天道信無欺巨川望汔濟寒谷待潛吹劍匣益精利
玉韞寧磷緇戒哉輕沽諸行矣自寵之伊我抱微尚仲
氏即心期討論自少小形影相差池比來胸中氣欲耀
天下奇雲雨沛蕭艾烟閣雙菱蕤幾年困方枘一旦迷
多岐道因窮理悟命以盡性知事去類絕絃時來如轉
規伊呂偶然得孔墨徒爾為早行多露悔強進觸藩羸
功名豈身利仁義非吾私萬物自生化一夫何驅馳不

如任行止委分安所宜勸爾休感歎與余陶希夷明年
郊天後慶澤歲華滋曲水杏花雪香街青柳絲良時且
暫歡樽酒聊共持閒過漆園叟醉看五陵兒寄言所思
處不遠來相追

青海西寄竇三端公

時同事弗同窮節厲陰風我役流沙外君朝紫禁中從
容非所羨辛苦竟何功但示酬恩路浮生任轉蓬

蕃中拘留歲餘迴至隴右先寄城中親故

蓬轉星霜改蘭陵色養違窮泉百死別絕域再生歸鏡
數成絲髮囊收收血衣酬恩有何力祇棄一毛微

吐蕃別館卧病寄朝中親友

星漢縱橫車馬喧風搖玉佩燭花繁豈知羸卧窮荒外
日滿深山猶閉門

吐蕃別館中和日寄朝中舊僚

清時令節千官會絕域窮山一病夫遙想滿堂歌笑處
幾人緣我向西隅

及第後答潼關主人

本欲雲雨化却隨波浪翻一霑太常第十過潼關門志
力且虛棄功名誰復論主人故相問慙笑不能言

河城南姚家浴後贈主人

新浴振輕衣滿堂寒月色主人有美酒況是曾相識

看渾中丞山桃花初有他客不通晚方得入因

有戲贈

朝來駐馬香街裏風度遙聞語笑聲無事閉門教日晚

山桃落盡不勝情

贈友人

南山雙喬松擢本皆千尋夕流膏露津朝披青雲陰負
雪出深澗搖風倚高岑明堂久不構雲幹何森森匠意
方雕巧時情正誇淫生材會有用天地豈無心

道州夏日郡內北橋新亭書懷贈何元二處士
結構池梁上登臨幾日回晴空交密葉陰岸積蒼苔蕪
氣中央滿清風四面來振衣生羽翰高枕出塵埃齊物

魚何樂忘機鳥不猜閒銷炎晝盡靜勝火雲開僻遠宜
孱性優游賴廢材願為長泛梗莫作重燃灰守道窮非
過先時動是灾寄言徐孺子賓榻且徘徊

道州弘道縣主簿知縣三年頗著廉慎秩滿縣
闕申使請留將赴衡州題其廳事

為理賴同力陟明非所任廢田方墾草新拓未成陰術
淺功難就人疲感易深煩君駐歸棹與慰不欺心

道州將赴衡州酬別江華毛令

此人好書破百
姓布絹頭及妄

杖行

布帛猶租任土宜
疲人識信每先期
明朝別後無他囑
雖是蒲鞭也莫施

道州夏日早訪荀參軍林園敬酬見贈

高眠日出始開門
竹逕旁通到後園
陶亮橫琴空有意
任棠置水竟無言
松窓宿翠含風薄
槿院朝花帶露繁
山郡本來車馬少
更容相訪莫辭喧

道州敬酬何處士懷郡樓月夜之作

清質悠悠素彩融長川迥陸合為空佳人甚近山城閉
一夜相望水鏡中

附

新居寺院涼夜書情呈上呂和叔郎中

裁眉山人

何玄上

庾公念病宜清暑遣向僧家占上方月光似水衣裳
濕松氣如秋枕簟涼幸以薄才當客次無因弱羽逐
鸞翔何由一示雲霄路腸斷星星兩鬢霜

道州敬酬何處士書情見贈

意氣曾傾四國豪偶來幽寺息塵勞嚴陵釣處江初滿
梁甫吟時月正高新識幾人知杞梓故園何歲長蓬蒿
期君自致青雲上不用傷心歎二毛

戲贈靈澈上人

僧家亦有芳春興自是禪心無滯境君看池水湛然時
何曾不受花枝影

三月一日是貞元舊節有感絕句寄竇三任黯
南盧七任雒陽

同事先皇立玉墀中和舊節又支離今朝各自看花處
萬里遙知掩淚時

初發通州答崔三連州題海陽亭見寄絕句

吏中習隱好躋攀不擾疲人便自閒聞說殷勤海陽事
令人轉憶舜祠山

附

奉陪郎中使君城上夜把火看花

段弘古

城上芳園花滿枝城頭太守夜看時為報林中高舉
燭感人情思欲題詩

答段秀才

盡日看花君不來
江城半夜為君開
樓中共指南園火
紅燼隨花落碧苔

宗禮欲往桂州苦雨因以戲贈

農人辛苦綠苗齊
正愛梅天水滿堤
知汝使車行意速
但令驄馬著郵泥

道州奉寄襄陽裴相公絕句

悠悠世路自浮沉
豈問仁賢待物心
最憶過時留宴處

豔歌催酒後亭深

呂衡州集卷一

欽定四庫全書

呂衡州集卷二

唐 呂溫 撰

詩

吐蕃別館月夜

三五窮荒月還應照北堂迴身向暗卧不忍見圓光

望思臺作

浸潤成宮盡蒼黃弄父兵人情疑始變天性感還生字

縣猶能洽閨門詎不平空令千載後悽愴望思名

孟冬蒲津關河亭作

息駕非窮途未濟豈迷津獨立大河上北風來吹人雪
霜自茲始草木當更新嚴冬不肅殺何以見陽春

鞏路感懷

馬嘶白日暮劍鳴秋氣來我心浩無際河上空徘徊

題梁宣帝陵二首

即讎終自翦覆國豈為雄假號孤城裏何殊在甬東

祀夏功何薄尊周義不成淒涼庾信賦千古共傷情

岳陽懷古

晨飈發荊州落日到巴丘方知剌剌利可接鬼神遊二
湖豁南浸九派駛東流襟帶三千里盡在岳陽樓憶昔
鬪羣雄此焉爭上遊吳昌屯虎旅晉威驚龍舟宋齊紛
禍難梁陳成寇讎鐘鼓長震耀魚龍不得休風雲一蕭
散功業忽如浮今日時無事空江滿白鷗

道州途中即事

零桂佳山水滎陽舊自同經途看不暇過境說難窮疊
嶂青時合澄湘漫處空舟移明鏡裏路入畫屏中岩壑
千家接松蘿一逕通魚烟生縹緲犬吠隔蔥蘢戲鳥留
餘翠幽花怯晚紅光翻沙瀨日香散橘園風信美非吾
土分憂屬賤躬守愚資僻地邱隱望年豐且保心能靜
那求政必工課終如免戾歸養洛城東

登少陵原望秦中諸川太原王至德妙有水術
因用感歎

少陵最高處曠望極秋空羣山噴清源脈散秦川中荷
鍾成雲雨由來非鬼功如何盛明代委棄傷幽風涇灞
徒絡繹漆沮虛會同東流滔滔去沃野飛秋蓬大禹平
水土吾人得其宗發機迴地勢運思與天通早欲獻奇
策豐財叙西戎豈知年三十未識大明宮卷爾出岫雲
追吾入冥鴻無為學驚俗狂醉哭途窮

奉勅祭南嶽十四韻

皇家禮赤帝謬護司封域致齋紫蓋下宿設祝融側鳴

澗警宵寐清猿通時刻澡潔事夙興簪佩思盡飾危墮
象嶽趾祕殿翹翬翼登拜不遑顧酌獻皆累息贊導儀
匪繁祝史詞甚直忽覺心魄悸如有精靈逼漠漠雲氣
生森森杉柏黑風吹虛簫韻露洗寒玉色寂寞有至公
馨香在明德禮成謝邑吏駕言歸郡職憩桑訪蠶事遵
疇課農力所願風雨時迴首瞻南極

經河源軍漢村作

行行忽到舊河源城外千家作漢村樵採未侵征虜墓

耕耘猶就破羌屯金湯天險長全設伏臘華風亦暗存
暫駐單車空下淚有心無力復何言

題河州赤岸村

左南橋上見河州遺老相依赤岸頭
匝塞歌鍾受恩者誰憐被髮哭東流

題陽人城

忠驅義感即風雷誰道南方乏武才
天下起兵誅董卓長沙子弟最先來

晉王龍驤墓

虎旗龍艦順長風
坐引全吳入掌中
孫皓一兒何足取
便令千載笑爭功

題石勒城二首

長驅到處積人頭
大旆連營壓上游
建業烏棲何足問
慨然歸去王中州

天生傑異固難馴
應變摧枯若有神
夷甫自能疑倚嘯
忍將虛誕誤時人

劉郎浦口號

吳蜀成婚此水濶明珠步障幄黃金誰將一女輕天下
欲換劉郎鼎峙心

自江華之衡陽途中絕句

孤棹遲遲悵有違沿湘數日逗清輝人生隨分為憂喜
迴鴈峰南是北歸

吐蕃別館送楊七錄事先歸絕句

愁雲重拂地飛雪亂遙程莫慮前山暗歸人眼自明

奉送范司空赴朔方

得遊字

築壇登上將，膝席委前籌。
虜滅南侵跡，朝分北顧憂。
抗旌迴廣漠，撫劒動旌頭。
坐見黃雲暮，行者白草秋。
山橫舊秦塞，河繞古靈州。
善守知兵事，唯應獵騎遊。

送文暢上人東遊

隨緣聊振錫，高步出東城。
水止無恒地，雲行不計程。
到時為彼岸，過處即前身。
今日臨歧別，吾徒自有情。

喜儉止至送宗禮南行

洞庭舟始泊桂江帆又開
魂從會處斷愁向笑中來
惝恍看殘景殷勤祝此杯
衡陽刷羽待成取一行迴

送段九秀才歸澧州

湘南孤白芷幽託在清潯
豈有馨香發空勞知處深
推賢路已隔賑乏力弗任
慙我一言分負君千里心
寸義薄聯組片誠敵無金
方期踐冰雪無使弱思侵

衡州送李十一兵曹赴浙東

慷慨視別劍淒清泛離琴
前程楚塞斷此恨洞庭深
文

字久已廢循良非所任期君碧雲上千里一揚音

臨洮送袁七書記歸朝

時袁生作僧蕃人呼為袁師

憶年十五在江湄聞說平涼且半疑豈料殷勤洮水上
却將家信託袁師

江陵醉中留別坐客

尋常縱恣倚青春不契心期便不親今日烟波九疑去
相逢盡是眼中人

道州酬送何山人之容州

匣有青萍筓有書何門不可曳長裾應須定取真知者
遣對明君說子虛

道州送戴簡處士往賀州謁楊侍郎

羸馬孤僮鳥道微三千客散獨南歸山公念舊偏知我
今日因君淚滿衣

春日遊郭駙馬大安亭子

戚里容閒客山泉若化成寄遊芳徑好借賞彩船輕春
至花常滿年多水更清此中如傳舍但自立功名

楚州追制後舍第直長安獄失囚花下共飲

天子收郡印京兆責獄囚狂兄與狂弟不解對花愁

衡州歲前遊合江亭見山櫻葉未拆因賦含彩

悵驚春

山櫻先春發紅葉滿霜枝幽處竟誰見芳心空自知似
羞朝日照疑畏暖風吹欲問含彩意恐驚輕薄兒

衡州登樓望南館臨水花呈房戴段李諸公

天桃臨芳塘暮色看愁思托根豈求潤照影非自媚

挂青柳絲零落綠錢地佳期竟何許時有幽禽至

合江亭檻前多高竹不見遠岸花客命剪之感
而成詠

吉凶豈前卜人事何翻覆緣看數日花却剪凌霜竹常
言契君操今乃妨衆目自古病當門誰言出幽獨

道州春遊歐陽家林亭

道州城北歐陽家去郭一里占烟霞主人雖朴甚有思
解留滿地紅桃花桃花成泥不須掃明朝更訪桃源老

政成興足則告歸門前便是家山道

衡州早春偶遊黃溪口號

偶尋黃溪日欲沒早梅未盡山櫻發無事江城閉此身
不得坐待花間月

衡州夜後把火看花留客絕句

紅芳暗落碧池頭把火遙看且少留半夜忽然風更起
明朝不復上南樓

夜半把火看南園花招李十一兵曹不至呈座

上諸公

天桃紅燭正相鮮
傲吏閒齋因獨眠
應是夢中飛作蝶
悠揚祇在此花前

順宗至德大聖大安孝皇帝挽詞三首

遐視輕神寶傳歸
屬聖猷堯功終有
待文德本無憂坐
受朝汾水行看告
岱丘那知鼎成後
龍馭弗淹留
監撫垂三紀聲徽
洽萬方禮因馳道
著明自墾田彰積
漸成鴻業從容守
太康更留園寢詔
恭聽有餘芳

早秋同軌至晨旆露華滋挽度千夫咽笳凝六馬遲劍
悲長閑日衣望出遊時風起西陵樹淒涼滿孝思

詠蜀客石琴枕

可憐他山石幾歲負貞堅推遷強為用雕斲傷自然文
含已江浪色起青城烟更聞餘玉聲時入朱絃絃

河南府試贖帖賦得鄉飲酒詩

酌言修舊典刈楚始登堂百拜賓儀盡三終樂奏長想
同鶯出谷看似鴈成行禮罷知何適隨雲入帝鄉

賦得失羣鶴

杳杳冲天鶴，風排勢暫違。
有心常自負，無伴可相依。
萬里寧辭遠，三山詎憶歸。
但令毛羽在，何處不翻飛。

道州南樓換柱

鴻災起無朕，有見非前知。
蟻入不足卹，柱傾何可追。
良工操斤斧，沉吟方在斯。
殫材事朽廢，曷若新宏規。

道州北池放鵝

我非好鵝癖，爾乏鳴鴈姿。
安得免沸鼎，澹然遊清池。
見

生不忍食深情固在斯能自遠飛去無念稻梁為

迴風有懷絕句

銀宮翠島烟霏霏珠樹玲瓏朝日暉神山望見不得到

却逐迴風何處歸

蕃中答退渾詞

退渾部落盡在而為吐蕃所鞭撻有譯者訴情於余因而答之

退渾兒退渾兒朔風長在氣何哀萬羣鐵馬從奴虜強
弱由人莫歎時退渾兒退渾兒冰銷青海草如絛明堂
天子朝萬國神島龍駒將與誰

上官昭容書樓歌

貞元十四年友人崔仁亮於東都買得研神記一卷有昭

容列名書縫處因

用感歎而作是歌

漢家婕妤唐昭容，工詩能賦千載同。自言才藝是天真，
不服丈夫勝婦人。歌闌舞罷閒無事，縱恣優游弄文字。
玉樓寶架中天居，絨綺異萬卷餘。水精編帙綠鈿軸，
雲母擣紙黃金書。風飄花露清旭時，綺窓高挂紅綃帷。
香囊盛烟繡結絡，翠羽拂案青琉璃。吟披嘯卷紛無已，
皎皎淵機破研理。詞縈彩翰紫鸞迴，思耿寥天碧雲起。

碧雲起心悠哉境深轉苦坐自摧金梯珠履聲一斷瑤
階日夜生青苔青苔闕空關曾比羣玉山神仙杳何許
遺逸滿人間君不見洛陽南市賣書肆有人買得研神
記紙上香多蠹不成昭容題處猶分明令人惆悵難為
情

聞砧有感

千門儼雲端此地富羅紉秋月三五夜砧聲滿長安幽
人感中懷靜聽淚汎瀾所恨搗衣者不知天下寒

早覺有懷

東方殊未明暗室蟲正飛先覺忽先起衣裳顛倒時嚴
冬寒漏長此夜如何其不用思秉燭扶桑有清暉

冬日病中即事

牆下長安道囂塵咫尺間久牽身外役暫得病中間背
喜朝陽滿心憐暮鳥還吾廬在何處南有白雲山

病中自戶部員外郎轉司封

羸卧承新命優容獲所安遣兒迎賀客無力拂塵冠偃

仰晴軒暖爻離曉鏡寒那堪報恩去感激對哀蘭

久病初朝衙中即事

沉疴曠十旬還過直城闈老馬猶知路羸童欲怕人又
隳三徑計更强百年身許國將何力空生衣上塵

道州城北樓觀李花

夜疑關山月曉似沙塲雪曾使西域來幽情望超越將
念浩無際欲言忘所說豈是花感人自憐抱孤節

道州秋夜南樓即事

誰令獨坐愁日暮此南樓雲去舜祠閉月明瀟水流猿
聲何處曉楓葉滿山秋不分匣中鏡少年空白頭

道州觀野火

南風吹野火焰焰燒楚澤陽景當晝遲陰天半夜赤過
處若鷲掃來時如電激豈復辨蕭蘭焉能分玉石蟲蛇
盡燦爛虎兕亦奔迫積穢一蕩除和氣始融液堯時既
敬授禹稼始肇跡遍生合穎禾大秀兩歧麥家有京抵
詠人無溝壑戚乃悟焚如功來歲終受益

衡州早春二首

碧水何逶迤東風吹沙草烟波千萬曲不辨蒿陽道
病肺不飲酒傷心不看花惟驚望鄉處猶自隔長沙

郡內書懷寄劉連州竇夔州

朱邑何為者桐鄉有古祠我心常所慕二郡老人知

偶然作二首

栖栖復汲汲忽覺年四十今朝滿衣淚不是傷春泣
中夜兀然坐無言空涕洟丈夫志氣事兒女安得知

古興

越歐百鍊時
楚卞三泣地
二寶無人識
千齡皆棄置
空巖起白虹
古獄生紫氣
安得命世客
直來開與祕
劍任
荆鐘看玉從
投火試必能
絕疑惑然後
論奇異

風詠

微風生青蘋
習習出金塘
輕搖深林翠
靜獵幽逕芳
掩抑時未來
鴻毛亦無傷
一朝乘嚴氣
萬里號清霜
北走摧鄧林
東去落扶桑
掃却垂天雲
澄清無私光
悠然返

空寂晏海通舟航

道州感興

當代知文字先皇記姓名七年天下立萬里海西行苦
節終難辨勞生竟自輕今朝流落處瀟水遶孤城

春日與李六舍弟聯句

始見花滿枝又看花滿地景且持增氣酒莫滴傷心淚

溫深誠長鬱結芳晨自妍媚恭笑歌聊永日誰知此時

意景
儉

鏡中歎白髮

年過潘岳纔三歲，還見星星兩鬢中。
縱使他時能早達，定知不作黑頭公。

友人邀聽歌有感

文章拋盡愛功名，三十無成白髮生。
孤負壯心羞欲死，勞君貴買斷腸聲。

貞元十四年旱甚見權門移芍藥花

綠原青壘漸成塵，汲井開園日日新。
四月帶花移芍藥，

不知憂國是何人

冬夜即事

百憂攢心起復卧夜長耿耿不可過風吹雪片似花落
月照冰文如鏡破

道州郡齋卧疾寄東館諸賢

東池送客醉年華聞道風流勝習家獨卧郡齋寥落意
隔簾微雨濕梨花

讀小弟詩有感因口號以示之

憶君未冠賞年華二十年間在咄嗟
今來羨汝看花歲
似汝追思昨日花

讀句踐傳

丈夫可殺不可羞如何送我海西頭
更生更聚終須報
二十年間死即休

道州月歎

別館月犁牛冰河金山雪道州月霜
林子規啼是血壯
心感此孤劍鳴沉火在灰殊未滅

風歎

青海風飛沙射面隨驚蓬洞庭風危檣欲折身若空西
馳南走有何事會須一快百年中

呂衡州集卷二

欽定四庫全書

呂衡州集卷三

唐 呂溫 撰

書 序

與族兄皋請學春秋書

儒風不振久矣某生於百代之下不顧昧劣凜然有志
翹企聖域莫知所從如仰高山臨大川未獲梯航而欲
濟乎深而臻乎極也凡學之道嚴師為難師資道喪八

百年矣自鳳鳥不至麒麟遇害血流戰國火發暴秦先
王之道幾隕於地賴漢氏勃焉而拯之醜糟粕揚煨燼
披雲霧揭日月夫子文章滅而復耀與火德俱朗者四
百餘年當時大教中興去聖未遠學士非師說不敢輒
言鴻儒碩生樂以善誘弘道雖為公卿教授不輟其徒
大者至千餘人小者亦數百人或升乎堂或入於室洋
洋濟濟有古風也夫學者豈徒受章句而已蓋必求所
以化人日日新又日新以至乎終身夫教者豈徒博文

字而已蓋必本之以忠孝申之以禮義敦之以信讓激之以廉恥過則匡之失則更之如切如磋如琢如磨以至乎無瑕故兩漢多名臣諫諍之風同乎三代蓋由其身受師保之教誨朋友之箴誡既知己之損益不忍觀人之成敗也魏晉之後其風大壞學者皆以不師為天縱獨學為生知譯疏翻音執疑護失率乃私意攻乎異端以諷誦章句為精以穿鑿文字為奧至於聖賢之微旨教化之大本人倫之紀律王道之根源則蕩然莫知

所措矣其先進者亦以教授為鄙公卿大夫恥為人師至使鄉校之老人呼以先生則勃然動色痛乎風俗之移人也如是是以今之君子事君者不諫諍與人交者無切磋蓋由其身不受師保之教誨朋友之箴誠既不知己之損益惡肯顧人之成敗乎而今而後乃知不師不友之人不可與為政而論交矣且不師者廢學之漸也恐數百年後又不及於今日則我先師之道其隕於深泉是用終日不食終夜不寢馳古今而慷慨抱墳籍

而太息吾兄亦曾以是為念乎小子狂簡實有微志蘊
童蒙求我之願立朝聞夕死之誓所與者不惟鴻碩之
老博洽之士與我同志者則為吾師與兄畧言其志也
其所貴乎道者六其詩書禮樂大易春秋歟人皆知之
鄙尚或異所曰禮者非酌獻酬酢之數周旋謁襲之容
也必可以經乾坤運陰陽管人情措天下者某願學焉
所曰樂者非綴兆屈伸之度鏗鏘鼓舞之節也必可以
厚風俗仁鬼神熙元精茂萬物者某願學焉所曰易者

非揲著演數之妙畫卦舉繇之能也必可以正性命觀
元化貫衆妙貞夫一者某願學焉所曰書者非古今文
字之外大小章句之異也必可以辨帝王稽道德補大
政建皇極者某願學焉所曰詩者非山川風土之狀草
木鳥獸之名也必可以警暴虐刺淫昏全君親盡忠孝
者某願學焉所曰春秋者非戰爭攻伐之事聘享盟會
之儀也必可以尊天子討諸侯正華夷繩亂賊者某願
學焉其餘非聖人所論不與於君臣父子之際雖欲博

聞不敢學矣吾兄達者也可不曰然乎嘗閱雅論深於春秋其間所得實曰淵正竊不自揣願以春秋三傳執摠衣之禮於左右童蒙求我兄得辭乎朝聞夕死某可逆乎無以流俗所輕而忽聖賢之所重也其餘五經當今孰可為某師者幸詳鄙志而與擇焉

上族叔齊河南書

大尹叔父閣下某聞水官修而龍至官失其方物乃坻伏以文章而言則先進為後進之官也亦宜正褒貶別

雅鄭宣六義合三變以修其官使後進之徒靡然向風
皦然知方能者勸不能者止於是乎文章之可見也如
掃除氛昏澄定波濤穹天清而日月耀滄海晏而蓬壺
出今夫先進之廢官久矣文猶龍也其可見乎伏惟叔
父蘊特進之明哀雅頌之缺常欲以三代制度訓斯文
前罷鎮南服入侍東掖詞林聳仰如登日觀莫不結轍
連馬懷編捧軸差池道路奔走光塵人人自以為齊公
之遇矣及乎昌言金馬高議承明懸大雅之衡以權後

進則乃以小子為稱首達勾萌而茂以柯葉翼鷁驚而
使之頡頏先達改觀同類駭聽譽動朝端聲馳轂下循
顧反覆誠非所堪竊料叔父之意豈不欲使濫音竊吹
者聞士會而西逃秦境敦行守正者望郭隗而北首燕
路夫是則小子敢賀天下文章廢而復興不敢自當其
遇也然大匠雖哲不能化擁腫之材大風雖壯不能起
凝滯之物曩充鄉賦薦辱公議昨詔賢良猥塵清舉叔
父以唱高寡和小子以名浮易喪間關堙鬱卒用無成

取笑薄徒貽羞左右雖失鵠而知反終胡顏而敢安愧
懼慙惶夙夜若厲叔父蹈中和之德遭兼濟之運荷深
知於明主懸大望於蒼生一朝秉唐之鈞埏埴萬物而
高明不奪於獨見鄙分克彰於日新茫茫前途未敢自
料豈遽以一第為得喪哉由是思之勃焉增氣遂欲攝
迹聲利潛心道藝窮六籍之統紀盡正變之形容使學
通天人文正雅俗然後抗衡當代為叔父之榮雖知其
難志不可奪謹獻近文七首徒跂聖人之域未臻作者

之方姑務自強式酬與進伏願特污省覽光賜教誨指以遠踪責以大成惠何加焉非敢望也

代李侍郎與山南嚴僕射書

僕射稟天全才受國重寄控全蜀咽喉之地當狂寇奔侮之衝處瘠土而其財甚豐訓羸師而其武可畏少分麾下潛運掌中再開劒閣之扃繼獻鹽亭之捷應接制使先假地征犄角王師且為鄉導削叛人之迹釋梓州之圍勞實倍多功無與讓聖上神武睿斷注意西南一

校之善否必知一夫之勞逸必察況閣下效彰朝論事
布人謠精神貫於神祇茂伐懸於日月豈復聽簿書之
巧詆笙簧之濫音來示所虞無足介意某以寡薄謬膺
重任舉關國計動屬軍期夙夜憂慙未知所濟過蒙稱
獎愧惕良深唯託方岳至公共守王度物估小事固無
二三共計遵行亦如受賜佩荷之至無喻下情某再拜

代李侍郎與宣武韓司空書

某以非才謬當重任事關國計動限軍期撫事知難夙

夜憂積蓋以運路壅滯私鹽撓法力非有司所及唯託
方鎮至公伏惟司空文武全才勲德茂著朝廷毗倚中
外共瞻勤王則知無不為憂國則言皆可復今春過日
獲拜旌麾眷私之餘已及此事蒙許同志立法協力徇
公對揚之初便具奏聞所以遣裴郎中往申朝旨議立
規模悉令咨託大賢非敢專行鄙見昨得巡院狀報伏
承司空德量旁通忠誠感發急公家之病同職司之憂
鹽法隄防已行文牒斗門開塞許有商量率先諸侯首

贊王度義形九牧忠動三軍意開而遠近承風言發而神明知感況某奉職之分承眷之深受賜懷仁豈同常等銘戴所至無喻下情

代李侍郎與徐州張尚書書

奉別紙示諭眷待殊異規畧端明究忠義之苦言暢經通之雅旨皆足以感動朝野光映古今一字之貴可懸於千金終身佩之何啻於三復甚善甚善伏以尚書才膺間出識蘊生知地承勲德行在詩禮自家達國移孝

為忠受任先朝克荷崇構控襟喉之地成節制之師動
必勤王志皆憂國忠實彰於行事義聲感於旁隣布在
人謠溢於時論鳴鶴有和鼓鐘必聞聖上神武聰明惟
新覆幬勵精戎事注意蕃隅方仄陋以旁求况勲賢之
自著何患乎誠不上達道不大光宣太阿之利用窮彛
鼎之盛烈者乎某以寡薄謬膺重任成賦之重撫事知
慙徒欲盡愚衷陳鄙見策朽磨鈍庶效涓埃竭誠捐軀
少酬恩遇知我者寡同志實難頃在江西過辱厚意常

懷慕仰頗歷歲時昨者以私鹽干禁漸耗公利汴州滯
運屢稽軍期忝當職司每積憂負輒率誠懇粗申條例
網羅盜糴節宣通渠實託衆賢敢專獨見果蒙弘至公
之量推急病之心率先侯伯首贊王度許以別設方畧
大為隄防究絕姦源通利國漕神之聽之言可復於天
地有始有卒事必立於邦家佇觀莫大之功以成不朽
之美諸侯師表天子腹心千載一時誠無與讓某奉職
之分受賜孔多拳拳寸誠夙夜欣企幸甚幸甚徐僚宜

並在使至口述伏惟昭悉

代辛將軍與普潤劉尚書書

某性質鄙昧智能無取承藉門緒早蒙驅策盡瘁軍府
備嘗艱難徒竭犬馬之勞詎濟弓裘之美家構未克國
恩未酬而謬典禁司職惟侍衛良時自晚宿志莫伸憤
血猶剛憂髮先白加以稟性寡合知音實難甘心此生
長鳴靡託豈料尚書推弘深之量啟特達之心愛念不
遺眷知益重昨者四牡來覲萬乘虛心旁求將帥之臣

佇清至公之鑒然則蕭何之稱必在韓信孝文有問宜
薦雲中而丹墀對揚首及庸瑣數陳本末獎飾逾涯達
其忠義之誠許其遠大之致雖躬論志業自漚肺肝纖
悉周詳豈能及此遂使鬱埋之志允達於宸聰樗朽之
材式孚於帝念言發九天之上聲聞四海之中行得舟
航坐生羽翼雖管鮑在齊載深知我之感王貢仕漢有
切彈冠之慶方諸今日未足為喻不圖知己之在於斯
義激血誠恩纏骨髓每一念至不覺涕流頌首糜軀豈

能報德維當竭誠礪節服義懷仁奉以周旋居之造次
青松得地方見於歲寒皦日在天願聽其心誓生死幸
甚幸甚屬有負薪之疾未申拜賜之禮瞻荷之至感懼
兼深拳拳下情未知所措稍任行李即冀趨謁伏惟照
察云云

代竇中丞與襄陽于相公書

某經術無取丘園自屏所期全拙豈敢近名二十五丈
汎愛博容不遺孤陋申以通家之好遇以國士之分禮

慙入室契辱忘年猥賜吹噓謬假鱗翼遂得價重江左
名聞天朝起家拾遺再命柱史時丁變故命偶屯難孤
鱗方困於蹄涔窮鳥再歸於仁德果蒙奏領列郡擢倅
三軍不汝疵瑕見容於歲月同我休戚每形於話言身
計皆奉良規家事悉資全力然後表達宸聽推致周行
南宮劇曹踐不終歲憲府雄秩拔於常倫內顧庸虛敢
云自致魏賢子夏宣尼之道彌尊漢用淮陰相國之言
始重徒以才負知己名懸古人致遠之效莫彰貽羞之

責斯及敢不砥礪微分激昂前途以明君今日之恩資
大賢積時之譽庶乎有立以答所知豈敢以尸素為榮
而負生平之論伏惟鑒察郡榻諸生戎旃故吏用獎恩
重生成感深瞻望門闌未獲拜謝銘戴兢惕莫知所裁
拳拳下情紙墨難具某再拜

地志圖序

廣陵李該博達之士也學無不通尤好地理患其書多
門歷世寢廣文詞浩蕩學者疲老由是以獨見之明法

先聖之制黜諸子之傳記述仲尼之職方會源流考同
異務該暢從體要倬然勒成一家之說猶懼其奧未足
以昭啟後生乃裂素為方儀據書而畫隨方面以區別
擬形容之訓解命之曰地志圖觀其粉散百川黛凝羣
山元氣剖判成乎筆端任土之毛有生之類大鈞變化
不出其意然後列以城郭羅乎陬落內自五侯九伯外
自要荒蠻貊禹跡之所窮漢驛之所通五色相宣萬邦
錯峙毫釐之差而下正乎封畧方寸之界而上當乎分

野乾象坤勢炳焉可觀與夫聚米擬其端倪畫地陳乎
梗概固不可同年而語詳畧也每虛室燕居薄帷晴褰
普天之下盡在屋壁戶納四海牕籠八極名山大川隨
顧奔走殊方絕域舉意而到高視華裔坐橫古今觀帝
王之疆理見宇宙之寥廓出遐入幽曾不崇朝與夫役
形神於歲月窮轍跡於區外又不可並軌而論勞逸也
且夫刪百代之弊綜羣言之首繁而不亂疎而不漏才
識以潤之丹青以炳之使嗜學之徒未披文而見義不

由戶而覩奧斯訓導之明也窮地而迷舉世而載事極
洪纖理通皦昧混一家之文軌張大國之襟帶覈人物
之虛實總山川之要會表皇威之有截明王道之無外
斯乃功用之大也見蒼梧塗山則思舜禹恤民之艱覩
窮荒大漠則悟秦漢勞師之弊覽齊疆晉壤則想桓文
勤王之霸觀洞庭荆門則知苗蜀恃險之敗王者於是
明乎得失諸侯於是鑒乎興替斯又懲勸之遠也然則
本之所以廣學流申之足以贊鴻業垂之可以示後世

豈徒由近觀遠以智自樂為室中之一物哉而時無知
音道不虛行舉地成圖聞天無路此志士儒林所以為
之頽息也某久從君遊辱命敘述庶明作者之意俾好
事君子知其所以然

送友人遊蜀序

始吾挹至源之貌若隴底積雪聳寒木於雲谿次吾覽
至源之文若驪龍相追弄明月於泉窟末吾聽至源之
論若泰山欲雨倒雲氣於滄溟如其貌可以振肅周行

如其文可以光潤石渠如其論可以感動宣室而淪蕩
江海垂二十年則不知天所以生之之意貞元甲乙歲
以親故勸勉來遊京師時然後言無辨以動衆樂然後
笑無歡以接物義然後取無食以寧居慨然悔之決策
長往因登紫閣峯而指曰西南青冥色連岷峨吾行何
歸山盡則住翌日告別於友人太原王玄運顧謂予曰
高雲出岫無時雨之會與風悠揚轉遠而散若至源者
其猶雲乎盍亦贈之序予和女

送琴客搖兼濟東歸便道謁王虢州序

東海搖兼濟年十三從淮南大軍有奇童之稱歲既冠
歷泗上劇職振能吏之聲而尚氣節重言諾臨財廉見
義勇蘊崇具美發以雅琴琅琅然若佩玉之有衝牙也
貞元丁丑歲觀藝京師冲宇罕覲正聲寡聽道不苟合
浩然東歸水流無心遇用則止弘農守御史中丞王公
得子最深且東諸侯之望也儻羽翼吾道鏗鏘爾音飛
而鳴之一日千里則何公門不可曳長裾乎大丈夫風

波未始有極生死且不足問况能離憂乎白露降秋雲
起仰見太華壯心勃興若不激徵變商是孤慷慨吾季
恭也詩有逸氣盍韻鍾律播於絲桐

聯句詩序

河南柳茂直與余有潘楊之睦且道義相得也余兄弟
志守拙默不交當世晨昏之外靖專一室顧我者唯茂
直而已以為切磋蓋常事討論有晏息導志氣徒然起
憤議時事余欲無言其或晴天曠景浩蕩多思永夜高

月耿耿不寐或風露初曉恍若有得或烟雨如晦緬懷
所思則何以節宣慄舒暢達情性其有易於詩乎乃因
翰墨之餘琴酒之暇屬物命篇聯珠迭唱審韻諧律同
聲則應研情比象造境皆會亦猶衆壑合注霈為大川
羣山出雲混成一氣朗宣五色微闡六義雖小道必有
可觀其在茲矣茂直命余序述存以編簡俾後之觀者
知吾黨所立之濫觴

送薛大信歸臨晉序

先師曰益者三友吾能得之豈惟直諒多聞而已可以
旁魄天人談堯舜之道則有吾族兄臯可以本情性語
顏夷之行則有太原王師簡可以發揚古訓論三代之
文則有河東薛大信此三君子或道以樂我或行以約
我或文以博我遭時則有光遯世則無悶其為益也不
亦大乎大信與予最舊始以孝弟餘力皆學於廣陵之
靈巖寺雲卷其身討論數歲嘗見大信述作必根乎六
經取禮之簡要詩之比興書之典刑春秋之褒貶大易

之變化錯落混合崢嶸特立不離聖域而逸軌絕塵不
易雅制而瓌姿萬變有若雲起日觀盡成丹霞峰拆靈
掌無非峻勢皆天光朗映秀氣孤拔豈藻飾而削成者
哉聖上方欲觀人之文潤飾洪業秉筆者如三光得天
每賀大信有其時矣無何予被鄉曲之譽賦於闕下以
文乖時體行失俗譽再為有司所黜此時大信亦與計
偕知機全高匣刃不試昔趙殺鳴犢仲尼臨河而逝予
之見黜予亦逡巡事雖不同其所感一也歲八月以牒

杞之戀告予于歸予思古人出處有贈乃語之曰吾聞
賢者志其大者文為道之飾道為文之本專其飾則道
喪返其本而文存且使不存又何傷矣彼邦是帝堯之
遺俗唐叔之所理必有忠信如君者焉問安之暇可與
之處琢磨仁義浸潤道德考皇王治亂之迹求聖哲行
藏之旨達可以濟乎天下窮可以據其光明無為矻矻
筆硯間也行矣大信苟非同志勿矢予言

道州律令要錄序

某頃累忝官尚書省御史臺偏觀諸曹多書令式格律
於其屋壁苟非以宦遊為情而奉其職者皆得日夕省
覽卧起出入目存心悟章章然如貫珠如循環吏無以
欺臨事不惑決繁滯舉枉直而叶於大中中人已上固
可循致吾不知其誰首之何前賢處心卹事之同也若
州縣者卑而近於人遠而切於得失動有懸人命關風
俗而墮者委成於一吏望空而署勤者檢閱山積神憤
氣沮卒無所歸政令之弊不亦宜乎此州法吏何洛庭

良士也與撮其要講其義書於廳事之左某不深於法
猶慮未盡後來君子其究成之此長人者之所急

元和五年

五月二
十七日

裴氏海昏集序

海昏集者有唐文行之臣故度支郎中專判度支事贈
尚書左僕射正平節公裴氏諱某字某考地毓德會友
輔仁氣志如神英華發外之所由作也初公違河洛之
難以其族行攀大別浮彭蠡望洞庭迴翔於巨湓流眄

於海昏海昏有歐山之奇修江之清陽溪之邃陽泉之
靈竹洞花塢仙壇僧舍雞犬鐘梵相間於清嵐白雲中
數百里不絕時也俗以遠未擾地以偏而寧開元之遺
老盡在猶歌詠乎升平公悠然樂之遂與我外王父故
屯田郎中集賢殿學士河東柳公諱某叔祖故相國宜
城伯諱渾洎故太常卿蘭陵蕭公定故秘書少監范陽
盧公虛舟故左庶子隴西李公勲為塵外之交極心期
之賞唯故給事中汝南袁公高故將作監河南元公亘

以後進預焉江左指紳諸生望之如神仙邈不可及每賦一泉題一石毫墨未乾傳詠已遍其為物情所注慕如此無何朝廷命公盈虛東南漕引吳楚中原百萬之衆仰食於公人不堪其煩我若無事往往佩聯印擁大蓋枉道而過舊山林壑之間琴詩不廢心計屈指而軍餼贍其大雅之全材者歟於戲太尉侍中勤勞王家惠於生人至公再世又以盛德屈於年運慶如壅川其決必大由是焜耀之烈重集於我郇公郇公始以大孝聞

中以大用顯次以大忠升藩屏三朝出入二揆述先職而掌邦賦修祖德而踐台衡理荆之政篆在樂石定蜀之武藏在冊府漢南之化方洽於人謠加以優游藝文惇悅經術身被華袞門全素風不畏強禦不侮孤賤久要皆當代長者推轂必一時雋傑海內士大夫如鱗羽之歸龍鸞君子曰郇公忠憲公之勲德節公之雅道為不忘矣郇公以霜露之感泣編遺文思所以垂諸不朽以為節公消息出處之道始於海昏遂於正集外別次

當時唱和遊覽餞勞之作凡九十六篇勒為海昏集上下卷不遠三千里授簡於小生俾酌歸趣而為序引某常備中臺之屬實辱至公之遇命以序敬不敢文為始陳古義用贊風訓昔者三代陳詩以觀民風作詐淫義躁靜柔剛於是乎取之喜怒哀樂吉凶存亡於是乎觀之兆於此必應於彼成乎終必見乎始詩不可以為偽魏公子為南皮之遊以浮華相高故其詩傲蕩驕志勝而專勤而不安晉名士為金谷之讌以邪侈相扇故其

詩濫溺淫志冶而緩往而不返正平公為海昏之會以
禮義相誨故其詩恬淡退志莊直立志退以獨全其道
立以兼濟於時立而不矜退而不悲適而不放樂而不
荒親而不比數而不黷如切如磋婉而有直體曰比曰
興近而有深致仁者見之邈世而無憂智者見之愛身
而有待暖乎若冬陽之煦油乎若春澤之浸其誘人也
易其感人也深卒不知其所以終也夫如是則觀南皮
之詩應劉焉得不天魏祚焉得不短觀金谷之詩潘石

焉得不誅晉室焉得不亂觀海昏之詩裴氏焉得不興
我唐焉得不理詩之時義其大矣哉天人國家之際其
至矣哉為節公卹公之子孫者其無忘哉元和五年五
月七日朝議郎使持節道州諸軍事守道州刺史上騎
都尉賜緋魚袋東平呂某謹述

呂衡州集卷三

欽定四庫全書

呂衡州集卷四

唐 呂溫 撰

表

代論伐劍南更發兵表

元和元年

臣某言臣伏見某月日詔旨更發太原鳳翔及神策諸鎮兵赴劍南東川者陛下睿筭無遺神武必斷與人除害順天行誅奮如霆之誅乘破竹之勢期於久逸無憚

一勞大正國經永清時祿百王盛事千古英聲天下幸甚天下幸甚然或時事之可否兵家之利病道途之險易將帥之宜稱不可不深圖遠計原始要終狂夫有可擇之言愚者有一得之慮管窺所至願效微忠臣竊以古今用兵皆在將勇師和政齊計勝不必多兵廣衆然後成功今高崇文等諸將所統已約一萬五千餘人以整擊亂以順討逆授之廟算假之天威馘醜摧兇需有餘力若更多徵征鎮廣合師徒臣竊計之其患有五一

則高崇文素非大將拔自偏鎮忠勇雖著威聲未洽本
兵既少兼統則多將皆權隸士非素撫雖是統帥勢全
烏合居常則猶可脅制臨敵則何以指揮非惟崇文才
分有限此亦自古兵家所難臣不敢廣引載籍上煩聖
聽請直以近事明之哥舒翰潼關之守郭子儀相州之
圍韓全義潞水之役皆以兵多將雜而致敗衄許叔冀
之保靈昌李光弼之全河陽李晟之收復京邑皆以兵
少將一而建大功成敗昭然而布在人口二則貞元已

來天下無事四方節將人各懷安陛下覆帔惟新理先
清靜今以西南小醜久稽天誅自春徂冬徵發已廣見
在兵力破賊有餘若更務濟師屢聞動衆山澗深阻暑
濕為沴北人南役誰不憚行去土離家動生愁怨往年
涇州叛卒職此之由事繫安危不可不察三則吐蕃盟
好未定窺伺在心間諜往來急於郵傳又必持兩端之
計與劉闢交通若開發兵西南多取邊鎮秋風即至虜
馬已肥冒隙乘虛必有侵軼事出萬一悔何可追四則

劉闢窮寇保險逃死雖禍淫助順天道甚明而兵凶戰
危人事難必脫貔武之師小不如意蜂蟻猶聚假息旬
時攻守之間動須應援固當潛鋒養銳以逸待勞今便
悉兵後將何繼五則劍州磽瘠居人食且不充蜀路險
艱餉運無由多致今屯兵日費何啻萬金數州米貴糴
且將盡千里飛輓所濟幾何若更加兵實難供贍一夫
設有菜色三軍無復鬪心幸可少以成功何必多而成
患今太原及神策等軍已上道者其數頗多足辦戎事

其鳳翔等鎮未發之兵伏乞聖恩且勒權停續候事宜
以議行止臣謬膺重任過蒙恩遇輒率狂瞽輕瀆宸嚴
苟利國家甘心鼎鑊無任兢惶懇迫之至謹奉表陳奏
以聞

代李侍郎賀德政表

臣某言臣聞上天垂象當分野者先知元后用心奉職
司者方見是以堯稱光被四岳得於疇咨舜號文明九
官稟於分命豈非隨方表忠因事立言陳力自參於化

源造膝難迷於日用伏惟皇帝陛下睿圖濬發玄德廣
運恢纂鴻緒允升大猷振千聖之遺休復百王之墜典
至如崇陵盡瘁率禮無違長信歸尊因心則感內成則
仁叙九族外平則義協萬方厚俗則寵及高年廣孝則
榮加錫類能刑則朝無隱慝善任則野無遺才修文則
戎蠻來王整武則南北繼捷此皆事光日月聲洽寰區
黔首之所謳歌縉紳之所抃歎其或機叅造物意兆先
天事隔於人謠功隱於朝聽者若非奉職之臣官業所

及諒無得而稱焉臣以庸劣謬膺重寄調盈虛而馭輕
重關成敗而繫安危職思其憂夕惕若厲每因釐率披
竭愚忠亟奉溫顏屢承睿旨有以知造化之意有以見
天地之心曠若發蒙析如愈疾管窺所至可得而言昨
者臣以潮州刺史李璿撓縱私鹽耗廢公利請從免職
以儆慢官陛下以為法令更改且當申諭道途悠遠容
或未知俾為後圖用緩前責弘恕包於廣大明察貫於
精微此則羣臣不可望清光者一也江南西道觀察使

楊憑奏以支郡旱歉經賦不充請征居地之羨且修稅
茶之法陛下以為天灾流行有時而息人怨滯結貽患
則深縱無日新之美忍復已除之弊特令寢奏姑務流
通有司知畫一之方販負有昭蘇之望此又羣臣不可
望清光者二也臣嘗使推官殿中侍御史崔太素奉使
淮南臣以其名秩甚卑濬決務重徵令郡縣整訓役徒
須示等威請賜章服陛下以為職任伊始勤効未成必
有可觀乃申後命以再陳所切方可其奏雖事從權輿

且符濟物之宜而賞不僭行已見永圖之旨此又羣臣
不可望清光者三也臣對揚之日親奉德音知臣使司
支計闕少必擬昭明儉德振起素風率身為天下之先
節用自宮中而始又云臺殿舊制已當惕慮經營改作
非所措懷將不崇三尺之階豈復議十家之產發自宸
念形於天顏意開而河海自清言出而神祇知感此又
羣臣不可望清光者四也陛下光臨大寶星歲將周貴
戚之賜與無聞恩幸之霑濡殆絕至於贍軍供國行賞

報功則必鴻毛府庫糞土金玉遂使夏州諸將恨效淺
而恩深劍外三軍知生輕而義重此又羣臣不可望清
光者五也夫唐虞盛烈文武餘風莫不傳諸聲詩布在
方冊且匹夫匹婦片善必書飛羽沈鱗一祥皆紀況陛
下動闕教化言在政刑理叅至道之精躬行盛德之事
而冲虛謙讓鬱而未發將何以光揚藝祖昭示後昆伏
請宣付史官永為代法臣幸蒙恩遇獲奉昌期言必親
聞事皆目睹分深骨髓義激血誠輕瀆宸嚴魂首飛越

代國子陸博士進集註春秋表

臣聞惟睿作聖觀乎人文達則化成窮則垂訓先師所以祖述堯舜志在春秋懸衡百王撥亂三季正大冠之本清至公之源通羣方以誠貞天下於一動無不順道德之玄機斷無不濟帝王之利器而梁木既壞生知蓋寡三傳得失索隱未周羣儒異同致遠皆泥沒微言於滋蔓亡要旨於多歧奧室不開漫逾千祀天其或者將有俟焉伏惟陛下德合乾坤明並日月氣和物茂遠至

邇安欲以人情為田講學而耨鎮定皇極輝光時雍道
之將行實在今日臣不揣蒙陋斐然有志思窺聖奧仰
奉文明以故潤州丹陽縣主簿臣啖助為嚴師以故洋
州刺史臣趙匡為益友考左傳之疎密辨公穀之善否
務去異端用明本意助或未盡敢讓當仁匡有可行亦
刈其楚輒集註春秋經文勒成十卷上下千載研覃三
紀玄首雖白濁河已清微臣何幸與道相遇竊以德之
匪鄰骨肉無應道苟訢合古今相知然則堯舜之心非

宣尼不見宣尼之志非陛下不行庶因儀鳳之辰永洗
獲麟之恨且臣官忝國學思非出位道為家寶罪實欺
天謹昧死寫前件書詣東上閤門奉進伏候聖旨

代齊賈二相賀遷二祖表

臣伏見今月十四日制命以尊親之義虔附懿祖獻祖
於德明興聖廟室正太祖元皇帝東向之尊者十五日
奉遷事畢十六日祫饗禮成日月貞曜乾坤定紀稱情
靡忒合敬有歸百神得受職之方萬國知來祭之本中

謝臣聞國有祀莫大於嚴祀祀有經莫崇於尊祖夏殷
得之以繁祉周漢得之而休明爰自晉魏迄於隋氏或
以祚短而不及祧正或以時難而未遑討論絲綸興謝
綿曠載祀竟虛盛美允屬昌期陛下道貫前王慶殷累
聖奉無競之烈克廣洪休瞻有赫之靈思正大典精誠
感念旰食疇咨內斷皇明俯裁羣議奉祖宗於常尊之
地定昭穆於式序之宜清廟肅雍玄穹保佑奔走夷裔
鼓舞生靈煥乎觀一代之光盛矣接千年之統臣等自

鍾舛薄坐嬰衰瘵不獲躬執遵豆稱慶闕庭誠仰聖敬
感深孝理形留神往百倍恒情

謝拾遺表

貞元十年

伏奉制命授臣左拾遺又中使毛進朝至宅奉宣進止
賜臣本官告身者澤濡窮鱗雷起幽蟄塵忝近侍冠軼
常倫震驚失圖兢跼罔據中謝臣常學舊史承訓先臣
皆以奉上自致為榮附下苟進為恥臣所以既孤之後
義不依人賣洛中之薄田歸闕下之舊宅退藏其跡私

誓於心不邀利於權門不求名於衆口星霜苦節夙夜精
誠惟願投軀盛時自結明主愚誠神感人欲天從果蒙
陛下自記姓名猥憐孤直振零丁於絕望拔曖昧於無
階獨斷皇明起寘清列俯降中貴內賜官告特違恒例
光寵賤臣俾其不出戶庭坐生羽翼萬乘知己一鳴驚
人公朝得盡節之方私室無謝恩之處顧惟凡瑣叨此
殊尤纏激血誠銘鏤膚骨採拔恩重泥塗感深畢性命
以為期裂肝膽而何述唯當竭誠陳力效節明忠使丹

心有孚白首無點然後敢望披雲捧日一識天顏則闔
門之灰粉如歸百生之至願斯畢無任感恩榮耀之至

御答

卿克修學藝信稟溫良是用命官列於近署欽惟朝典
煩有表章所謝知

謝章服表

今月二十一日高品薛盈珍至奉翔府奉宣進止賜臣
緋衣魚袋笏并袋紫衣一副者發揚宸念昭灼恩光瞻

奉自天戰跼無地

中謝

臣孤陋無取過蒙獎錄聖慈周

洽天造曲成恩重出疆俾諧盡飾九重清秘不忘絕域
之單車萬乘憂勤特記微臣之命服衣分內府錫及近
藩未申汗馬之勞遽冒濡羈之刺在笥增感撫躬若驚
隕越兢慙罔知攸措

代孔侍郎蕃中賀順宗登極表

六月十四日入蕃告哀使左金吾將軍兼御史中丞田
景度至吐蕃列館伏承皇帝陛下以正月二十六日明

德奉天纂臨宸極重光昇曜百化維新澤被幽遐慶車
動植中賀臣聞和氣既蒸勾萌畢達時雨將降柱礎猶
知臣從單車閑留絕域天臨日照而別處幽陰雷動聲
聞而兀為聾聵伏承陛下義救柔遠體及窮荒始獲虔
奉德音仰沾聖澤具寮就列無階蹈踴之初庶物效靈
獨在飛沈之後舛薄鍾命恥玷自躬疚心厚顏罔知攸
措今月七日自列館迴至河州大夏川即以十二日進
發星言夕惕莫敢遑寧瞻望闕庭載深感踴無任喜抃

屏營之至

代文武百寮上尊號第三表

臣等自管窺天以凡揆聖度奉徽號罄陳至誠而再降
謙光未迴宸睠慙跼罔據彷徨失圖中謝臣聞強名曰
道莫體混元之功推大於天豈孰大成之德徒以物觀
德視人津涯俾其會歸有所則象伏惟皇帝陛下克廣
睿圖紹休聖緒順考古訓茂宣重光亭毒以佐天和震
曜以除人害性與道合身為化先神行六幽威動九服

求珠赤水觀妙用於無方檢玉名山告成功而有日豈
可過損盛德不照鴻休棄臣子瀝血之誠阻華夷傾首
之望當仁必受乃曰至公與物無私寧嫌在已安卑者
地山嶽之峻豈慙好謙者天日月之光何讓道貴傳繼
禮從宜稱邦家之舊典不可以廢天人之合應不可以
違臣等繆服官常親承至化一披肝膽三瀆宸嚴隕越
為期俯伏以俟實望陛下隨時立教以欲從人遊神於
不宰之鄉屈已於有名之域潤色大寶發揮皇猷古今

一時天下幸甚

代文武百寮謝宣示元和觀象厯表

臣等言伏見今月十三日宰臣奉宣聖旨以肇建元和
惟新寶厯極其幽蹟冠以睿文思示具寮慶昭萬國中
謝臣聞清濁既判象數相生一元起於帝圖三統成於
人道形器之表推步而得恍惚之際錙銖不差有開必
先聖作物觀伏惟皇帝陛下誕膺駿命敬授人時爰詔
日官底定厯法啓閉元氣節宣羣生役五行於文字貫

七曜於珠璧仰觀俯察允協於神休東作西成永貞於
農候感動夷夏歌舞飛沈天子之大政行焉聖人之能
事畢矣臣等幸脩朝序親奉昌期竊見天心敢迷日用
無任蹈詠之至

代文武百寮賀放浙西租賦表

臣等言伏見今月十五日制命以天下經賦首於東南
浙右諸州荐罹災歉全予逋債大敷湛恩人謠勃興朝
聽震動中賀臣聞三王已降綿曠千祀為邦之政盡在

欲理之主甚衆莫不知傳戒獨豐語稱與足至於愛人
節用之際躬紆國之時則必情隨事遷以欲忘道故
曰人鮮克舉行之惟艱伏惟皇帝陛下濬發睿圖紹休
聖緒躬將慈儉子育困窮皇明燭幽惠訓不倦撫臨萬
國曾未再周深求疾苦之源屢下蠲除之詔裁戎祀之
經費減乘輿之服御雖拜計之有羨入憂於未憂雖生
人之所樂輸損之又損風行號令日貫精誠明神聽其
德音和氣生於文字將舟車所及咸升至理之期豈江

湖下方獨被曲成之澤臣等尸素有日獻納無聞尚勞
聖心軫恤人隱甘同凡品不敢望於清光竊與疲疇共
謝生於玄造無任感抃之至

代文武百寮謝許遊宴表

臣某等言今月二十三日宰臣奉宣進止如聞百寮士
庶等親友追遊公私宴集及晝日出城餞送每慮奏報
自今已後各暢所懷者志存必信義切同休令行如春
神應若響寒水暉潤嚴風變和推已感於人心發生先

於天意臣某中謝臣聞與人同其樂者不必盡致於韶
夏之庭在夫不奪其歡而已與物致其誠者不必日効
於丹青之信在夫不察其細而已况乎縉紳之樂名教
聚皆以類臣子之事君父遊必有方豈足輕聳物情遽
塵天聽伏惟皇帝陛下光纂十聖威臨萬國神武功就
人文化成窮溟無波豐歲將晏樂奏穆清感深乎共樂
之道駕言遊幸思所以適人之方爰詔撫臣式將明命
優諭卿士達於庶人琴筑追遊無憚京輶輶駟送遠勿

限嚴城禁吏司之苛察盡朝野之歡泰始覺飛沈之樂
宇宙之寬物不自疑人知得所在宗載考夜飲承湛露
之恩求友相鳴時宴奉需雲之慶浹休聲於夷夏蒸喜
氣於山川千載之昌運允符百王之遺美斯舉臣等謬
膺委任親奉休明方感生成之德更蒙優貸之詔恭承
睿旨務竭歡心飽思屬厭醉念溫克戒竹林之虛誕去
金谷之浮華君雖不察於泉魚臣敢有愧於屋漏承歡
且懼居寵彌驚稽首知慙殺身何報無任感恩兢惕之

至

代文武百寮進農書表

臣某等言臣等伏准故事每年二月一日以農務方興
令百寮具則天大聖皇后所刪定兆人本業記奉進者
中謝臣聞不愛牲玉祈穀於圓丘可以致誠未足以勸
衆躬秉耒耜藉田於千畝可以示勸未足以教人必也
應天地之和順陰陽之理利其器用精厥法式變之而
不倦動之而不勞四海靡而風行百姓迷其日用弘我

政本實惟農書伏惟睿聖文武皇帝陛下德茂生成道光慈儉捐金而寶穀菲食而粒人考堯典以授時稽禹貢而任土潔粢盛而大事在祀銷劍戟而盡力為農豐年屢薦於郊歌嘉瑞繼光於國史而不自滿假惟懷永圖每至獻歲載陽仲春初吉俯察土膏之候仰觀晨正之祥經始歲功導揚生德徵有司之舊典奉先后之遺文深居穆清親覽奧妙匪崇朝而盡更田畝不出戶而遍洽人情見梓草抔土之艱知寒耕熱耘之苦宸心感

念訓畝昭蘇一歎而時雨先飛三復而春雷自起臣等
業慙學稼祿過代耕親承務本之風日奉在勤之訓三
時不害觀玉燭於氤氲九扈孔修賀生靈於富庶謹繕
寫前件書凡二十卷共成三卷謹詣東上閣門奉表陳
獻以聞

代杜司徒謝上表

臣某言伏蒙聖恩以臣久更重職謬踐中台爰詔有司
俾撰良日授節冊命備禮蒞官當千載之休期復三公

之故事俯僂恭命震驚失圖中謝臣聞官以昭德物以表功賞不僭行禮無虛設臣識非經遠才乏將明階緣恩遇叨歷寄任漫踰三紀祇事四朝徒竭筋力之勤曾無塵露之效陛下矜其衰疾許釋煩重而猶委代天之務正論道之司拜冊彤庭奉謁清廟被之法服導以羽儀會府宿設羣官序送降德音於中貴分肴醴於御厨事出殊恩動為榮觀禮成而退身驚日月之光寵極自思心醉雲天之澤素髮垂領華袞在躬喜過生悲感深

以泣雖志同犬馬願奉主於無疆而年在桑榆將報恩
而何力無任感抃屏營之至

代杜司徒賀赦表


臣某言伏見今月二日制書改元元和大赦天下新雷
雨之澤重日月之光仁被幽遐慶覃動植三元經始萬
化惟新臣某誠歡誠忭頓首頓首臣聞義軒馭宇堯舜
為君德莫盛於好生政莫弘於在宥然而事資體要理
極精微百王所難千載斯遇伏惟皇帝陛下纂臨大寶

欽定四庫全書

卷四

光啓睿圖當獻歲之元順陽春之氣朝前殿御正門發
德音布慈旨明大孝之本褒至忠之後省徭捐稅以清
疾苦之源蕩累滌瑕以厚廉恥之俗往典之所未舉前
代之所未該莫不悉出宸衷咸歸聖政坐開仁壽之域
佇見雍熙之朝凡在生靈孰不慶幸況臣陳力歲久受
恩最深而蒲柳餘年犬馬多疾不獲奉觴丹陛蹈詠康
衢猶蒙天眷留家聖慈曲至特降中使俯加慰勉衰憊
增氣枯朽生光施重丘山感深骨髓闔門灰粉豈足上

報無任喜懼屏營之至



呂衡州集卷四